

Revista BOULEVARD



Den number di tur su fiel lesa-
dornan, ta desea tur Mama ariba
nan dia, un dia yena cu regalo.
Tur clase di felicidad ariba boso
dia. **PABIEN.**

ROWIGINI'S

(Sra. Olga Lopez)

Conoci pa su platonan
delicioso y criollo.
Y variacion grandi di basket.



Ta felicita tur
MAMA
ariba nan dia.

PABIEN

Sta. Cruz 48

Tel: 28459

SANTA CRUZ RUMSHOP

TA FELICITA
TUR MAMA
DI ARUBA
ARIBA NAN DIA
TAN GLORIOSO



BETICO CROES LIDER DI MEP A SER GRAVEMENTE HERIDA PA TIROTEO DI POLIS



Foto: Exclusivo Revista Blvd.

Sr. Betico Croes saliendo for di camber di operacion

Diadomingo atardi 24 april e Pue-
blo di Aruba a ser ranca for di su
tranquilidad pa medio di un tiroteo
causa pa un agente policial. E polis
yama Libier for di un distancia hopi
serca lo a tira ariba e barida di e li-
der di M.E.P. Sr. Betico Croes. Ta-
bata na e momento aki tambe cu e
simpatizadornan di e partido Geel
no por a domina nan rabia y a cu-
minsa un batalla di piedra ariba e
agentenan policial cu tabata presen-
te den estilo di Riot Comando. E
publico cu tabata presente lo tabata
tin talvez un solo deseo, ta pa tuma
venganza ariba e agente policial cu a
comete e acto tan baho aki cu por
poco a resulta den lo peor. Varios
auto di polis a ser destrui pa baran-
canan di piedra cu a ser tira den di-
reccion di e polisnan. E armanan di
e agente policialnan na e momento
ey a perde nan valor y no por a do-
mina e publico. E polisnan com-
prendiendo tambe talvez cu nan bi-

da ta na peligro lo a dicidi e ora ey
pa bandona e tereno di Winston
cual tereno di bala a ser cambia den
un tereno di batalla di guerra. E
agente oficial cu a dispara ariba Be-
tico Croes mes mester a tuma trata-
mento medico na hospital, cual se-
gun informacionnan no oficial no
tabata nada di gravedad.

E solo tabata mandando completa-
mente su rayonnan di oro ora cu e pa-
rada di M.E.P. cu a ser forma tabata
yegando su final. E banderanan geel
cu nan letrasnan corra formando e
palabra M.E.P. tabata brilla den e
claridad di solo. Betico Croes cu un
sonrisa ariba su cara rondona pa
barba ta mandando su saludo pa su
pueblo cual tabata para banda di ca-
minda. Un sonrisa cual pronto lo
desaparece pa duna espacio pa un
dolor. E publico para banda di ca-
minda emociona ta tratando na cap-
ta un sonrisa for di nan lider.

Aplauso tabata resona como recompensa pa nan lider. E cantidad di pimentonnan cu tabata resona tabata duna e toque maravilloso na e parada. Un truck grandi tocando musica tabata percura pa e ambiente necesario. E tereno di Winston ya ta den bista. Un deseo grandi a ocupa Betico Croes pa e parada por sigui un poco mas den Santa Cruz. E otro parti di Santa Cruz tambe merece su bishita pa e por duna su saludo. Campaña ta completamente aden. Contacto di antemano lo a ser tuma cu inspector Peterson, pero esaki no a duna su aprobacion. E jeep di Betico Croes ta yegando e tereno di Winston. E tereno di bala a ser pasa. Ta realizable cu e parada lo yega na su final. Mas nan no por sigui. E caminda tabata sera pa e polisnan obligando e autonan pa turna e caminda di santo cu ta kedaendo parti noord di e tereno Winston. Diripiente un auto policial a pasa algun auto perteneciendo na e parada y a para dilanti e jeep di Betico Croes. Tanto Glenda su señora di Betico como Aiky Croes ruman di Betico Croes a keda mira otro puntrando den nan mes ta kico lo ta e opinion di e agente policial. Betico cu un sonrisa chiquito a baha for di e jeep. E lo bai trata na convence e polisnan. Pero e agente policial aki parece cu no conoce kico ta alegria of placer. Cu un voz halto e lo a duna di comprende esaki. Betico a dicidi di aserca e polis un poco mas.

Comentarionan ta bisa cu e agente policial lo a habri e porta di su auto y a pusha Betico cu ne. Algun hende a hala mas aserca pa mira kico lo ta e opinion di e polis. E agentenan policial lo duna permiso pa e parada sigui? "Ta kico ta pasando y pakico haciendo asina?" Betico lo a puntra e polis. Un tiro dispara den halto tabata e contesta. Un poco rato despues a resona un otro tiro y e daño a ser causa. Betico a kita cai abou bisando e siguiente: "DANKI MI PUEBLO".

Sr. Efrain Croes
ruman di
Betico
tabata inconsolable



Foto: Exclusivo Revista Blvd.

E oloshi na e momento ey tabata marca mas o menos 4'or y 40 minuut di atardi. Un panico enorme a cuminsa reina. "Nan a mata Betico, polis a tira Betico mata," un cantidad di hende tanto homber como muher a cuminsa grita. E tereno di bala na unda semper sa reina alegria y aplauso a cambia pa un tereno di

drama. Varios hende tanto homber como muher a cuminsa yora y hasta tabata tin hende cu a cai na rodilla mandando oracion na cielo. "E desgraciado a tira Betico," un grito di un hende muher a resona bou yoramento. Gritonan di duele y odio pa e daño causa na nan gran lider cu no por alcanza consuelo.

The Flying Top 10

COMBINA CU EXITOS
1320
VOZ DI ARUBA

1. Golpe con golpe
(Pastor Lopez)
2. Marea de la mar / Soledad
(Ilan Chester)
3. Atada a nada
(Lucia Mendez)
4. Quien sera
(Sumidad H.)
5. El Guajaba
(Los Originales)
6. Spaar bo amor
(Dhaddy y Tony)
7. Lara's Theme
(Tino Ruiz)
8. O soy tu hombre o no lo soy
(Jose Luis)
9. Den mi sueño
(Willie Polanco)
10. Maria, Maria
(Vicente Fernandez)



Foto: Exclusivamente Revista Blvd.

E simpatizadornan di M.E.P. na momento cu masalmente nan a cuminsa acudi na Hospital sperando ariba e ultimo noticianan.

Aiky Croes cu lagrima na wowo conhuntamente cu algun amigo a uni forza pa haya Betico den e jeep. Cada minuut na e momento ey tabata costoso. "Awor si mi no por mas," Betico den e jeep lo a bisa ainda. "Ai mi pueblo."

Mientras cu Sr. Betico Croes tabata na caminda pa hospital, e tereno di Winston a cambia pa un tereno di guerra. Un publico domina pa rabia y odio a lanta contra e polisnan. Barranan di piedra tabata ser manda ariba e autonan di polis. E polisnan kende a realiza cu nan no por mantene e ordo mas a dicidi di bai for di eyan. Cinco polis a keda herida. Entrenan e polisnan herida tambe ta pertenece e polis cu a tira ariba Betico, Sr. Libier. Un homber di un poco di edad a bisa, cu nunca antes den su bida e la yega di tende y mira asina un desordo grandi. For di e Truck cu tabata percura pa musica e siguiente palabranan pa medio di microfoon a ser manda: "Por fabor, ta haci un suplica pa tur presente keda calma. Pasobra e polisnan cu actualmente ta presente ta inocente y esun cu a causa e daño ya a ser hiba pa e polisnan. Un persona a kita

cai abou ariba e tereno di Winston. Un desmaya a percura pa esey.

Hospital Dr. Horacio Oduber a sera conoci cu un multitud grandi di publico kendenan a uni nan mes sperando e ultimo noticia y tambe pa duna sanger. Nan lider merece di keda na bida. Un tension profundo tabata reinando. Gritonan lanza for di e publico cu a acudi hasta tabata grita cu e polis cu a tira Betico mester ta mata. Otronan tabata yorando. E pena tabata ocupa un y tur cu tabata presente na hospital. Varios di esnan perteneciendo na e partido M.E.P. a hiba un discurso tanto pa nort como pazuid di hospital tratando asina na calma e publico presente cu tabata dispuesto pa drenta den cualquier accion di protesta. Pero sin resultado. E publico presente no por a ser calma. E unico persona cu por calma e publico mes ta drumi den camber di operacion luchando contra e morto. Den e sala di operacion e dokternan encabeza pa dokter W.J. Engelbrecht tabata haci nan maximo esfuerzo pa haci di e operacion un exito. Un borchí den e gang di hospital ta du-

na bo di comprende pa medio di e palabranan "OPERATIE AFDELING GEEN TOEGANG cu bo ta enfrente di e camber di operacion. Ariba stul e mama di Betico Sra. Mimita Croes conhuntamente cu su casa, Sr. Francisco Croes ansiosamente tabata spera cualquier noticia di nan yui. Tanto e mayornan di Betico, su rumannan y su señora tambe su yiunan tabata mustra palido pa e ansha y susto cu nan ta hibando. Nan stima ta luchando pa su bida.

Dilanti television esnan na nan cas tabata buscando un lugar dilanti television pa sintoniza e ultimo noticianan cu Tele-Aruba ta transmiti. Un anuncio a sigui pa Tele-Aruba anunciando ariba ordo di Gezaghebber cu tur lugarnan cu ta bende bebida fuerte mester sera nan porta te un otro aviso. Tabata mas o menos 7'or y 28 minuut ora cu Betico Croes despues di un ora y mei di operacion a ser saca for di camber di operacion na tino y bou kehamiento a ser hiba pa e camber di Cuido Intensivo. Un y tur a tene nan corazon ora cu Dokter W.J. Engelbrecht a anuncia cu e operacion di Betico Croes tabata un exito aunque cu su estado ainda ta critico. Betico Croes a ser alcanza pa un bala cual a penetra parti robez di su barica bou di su pulmonnan sin a toca esaki lagando dos buraco den su curpa como cu e bala a penetra y sali bek pa su lomba. E boffi di Betico a ser destrui totalmente na cual si tur cos bai bon e lo tin cu sigui un bida sin esaki. Betico Croes a perde dos liter y mei di sanger. Tabata laat den oranan di marduga ora cu e publico simpatizadornan di M.E.P. a cuminsa bandona e hospital. Nan tabata un poco mas tranquil. E operacion di nan lider tabata un exito. Pero Aruba mientras tanto ta sigui den un tension. E daño cu a ser comete pa un agente policial hamas lo por ser drecha.